



Rabu, 09 Desember 2020

Ogen: Keluaren 16:15



PANGAN SI IBEREKEN TUHAN



Pemeliharaan Dibata jadi asam kegeluhen bangsa Israel ibas perdalanen i Mesir nari ku tanah Kanan. La saja ijagaina alu 'tiang awan' suari dingem berngi tapi pangan inemen ikuhiNa. Amin bage gia bangsa enda megati lalap la ngasup ngataken bujur, tetap erbanding banding kerna kegeluhen paksa i Mesir ras siinanamina ibas perdalanen paksa sie. Kerna kerina pangan sintabeh si lit I Mesir aminna pe statusna selaku tabanen lebih senang iakapna asangkan jadi kalak bebas tapi terancam panganna, la seri bagi siiarapkenna. Ibas situasi sibagenda me Dibata mereken pangan, manna, guna njabab jungut-jungut bangsa e.

Arah e tangkas teridah kuga Dibata ncidahken kuasaNa. Situhuna enggo me tangkas kuasa Dibata ilebe bangsa enda, ija arah erbage perbahanenna man bangsa e menaken kin erbage mara i Mesir gelah ibere raja Piraun ia ndarat i Mesir nari. Ibas perdalanen, lau inemen, pangan, berngi simbergeh dingem suari si melas, kerina keadan e Tuhan tetap turut campur tangan ibas kegeluhen bangsa e.

Renungenta enda nuriken bangeme Dibata ngelaken pangan man bangsa e. La erpilihan, bayak musil, kalak mbelin ntah danak-danak. Kerina lit hakna ngaloken pangan siisikapken Dibata man bana alu la kekurangan, amin erbage carana ngidah ras ngelola siialokenna e kerina.

Pangan enda desken 'perjamun' siisikapken Jesus ibas Lakon Persadan tapi lit bedana maka siisikapken Jesus ibas tradisi gerejata e ibas Lakon Persadan la banci kerina ialoken kalak Kristen khususna man anak-anak, sabab salah sada sarat sibanci ikut ibas lakon e alu ngakuken kiniten. Janah sienda banci ilakoken kalak si enggo ngawan emaka anak-anak langa banci ngaloken roti ras anggur (ibas LPS) aminna status anak-anak enggo jadi anggota keluarga Dibata ibas gerejana.